

Na osnovu člana 16. stav 2. Zakona o Vladi Zeničko-dobojskog kantona-Prečišćeni tekst, („Službene novine Zeničko-dobojskog kantona“, broj: 7/10), na prijedlog Ministarstva za obrazovanje, nauku, kulturu i sport Zeničko-dobojskog kantona, Vlada Zeničko-dobojskog kantona, na 143. sjednici, održanoj dana 14.05.2018. godine, d o n o s i

ODLUKU

o naknadama i drugim materijalnim pravima koja nemaju karakter plaće za ustanove osnovnog i srednjeg obrazovanja i odgoja na području Zeničko-dobojskog kantona

Član 1.

(Predmet Odluke)

Ovom odlukom uređuju se uvjeti, kriteriji, visina i postupak ostvarivanja prava na naknade koje nemaju karakter plaće za radnike u osnovnim i srednjim školama i đačkim domovima na području Zeničko-dobojskog kantona, (u daljem tekstu: radnici u obrazovanju), a čija visina i način ostvarivanja nisu regulisani Kolektivnim ugovorom za djelatnost osnovnog i Kolektivnog ugovora za djelatnost srednjeg obrazovanja, za teritorij Zeničko-dobojskog kantona, („Službene novine Zeničko-dobojskog kantona“, broj: 13/16), (u daljem tekstu: Kolektivni ugovor).

Član 2.

(Naknada za ishranu)

- (1) Radnici u obrazovanju, u smislu ove odluke, imaju pravo na novčanu naknadu za ishranu u toku rada-(topli obrok), u neto iznosu od najmanje 8 KM (slovima: osam konvertibilnih maraka) po radnom danu, što utvrđuje Vlada Zeničko-dobojskog kantona za sve budžetske korisnike.
- (2) Radnik u obrazovanju iz stava (1), ovog člana ima pravo na naknadu ishrane (topli obrok) za vrijeme rada, samo za dane prisustva na poslu.
- (3) Pravo na naknadu iz stava (1), ovog člana ne ostvaruje se u slučaju odsustva sa posla po bilo kojem osnovu, (godišnji odmor, neplaćeno/plaćeno odsustvo, službeni put, odsustvo zbog bolesti, suspenzije, porođajnog odsustva i slično).

Član 3.

(Uvećanje plaće po osnovu minulog rada)

Radnicima u obrazovanju, osnovna plaća se uvećava za svaku započetu godinu ukupnog radnog staža za 0,5% , s tim da ukupno povećanje ne može biti veće od 20%, te da procenat uvećanja plaće po osnovu minulog rada ne može biti niži od procenta za juni 2016. godine.

Član 4.

(Pravo na otpremninu)

Radnici u obrazovanju imaju pravo na otpremninu prilikom odlaska u penziju u iznosu od svojih 5 (pet) ostvarenih prosječnih neto plaća isplaćenih u prethodnih 6 (šest) mjeseci ili 5 (pet) prosječnih neto plaća isplaćenih u Federaciji BiH prema posljednjim objavljenim podacima Federalnog zavoda za statistiku, ako je to za radnika povoljnije.

Član 5.

(Naknada za prijevoz na posao i sa posla)

- (1) Radniku u obrazovanju kojem nije organizovan prevoz na posao i s posla pripada naknada za prevoz u visini i na način da ako je mjesto stanovanja radnika udaljeno od mjesta rada najmanje 5 (pet) kilometara, a najviše 120 km, radnik ima pravo na troškove prijevoza na posao i s posla u visini mjesečne karte gradskog, prigradskog, odnosno, međugradskog saobraćaja.

(2) Pravo na troškove prijevoza, ostvaruje se na osnovu pismenog zahtjeva radnika u kojem navodi adresu stvarnog stanovanja, mjesto rada i činjenicu da svakodnevno putuje od mjesta stanovanja do mjesta rada.

(3) Uz zahtjev se prilaže pismeni dokaz firme čiji se prijevoz koristi za dolazak na posao i povratak sa posla dnevna ili mjesečna karta, potvrda o prebivalištu/boravištu (prijavnica CIPS-a), kao i izjava data pod punom kaznenom i materijalnom odgovornošću da svakodnevno putuje na posao i s posla iz mjesta stvarnog stanovanja (prebivališta/boravišta), a koje se nalazi izvan sjedišta organa u kojem je uposlen.

(3) Naknada iz stava (1), ovog člana, odobrava se rješenjem koje donosi direktor škole.

(4) Zloupotreba korištenja naknade iz stava (1) i (2) ovog člana, smatra se materijalnom štetom i podliježe obavezi odgovornosti za tu štetu u skladu sa zakonom.

(5) Radniku koji za potrebe prijevoza dolaska na posao i povratka sa posla koristi privatni automobil pripada naknada u visini cijene mjesečne karte u javnom prometu.

(6) Ukoliko radnik koristi više prijevoznih sredstava od mjesta stanovanja do mjesta rada, organ u kojem je zaposlen dužan je da mu osigura mjesečnu kartu odgovarajućih prijevoznika, koja je najpovoljnija za zaposlenika.

(7) Pravo na naknadu troškova prijevoza iz stava (5), ovog člana, ostvaruje se na način iz stava (2) i stava (3), ovog člana.

Član 6.

(Drugi vidovi naknade)

(1) U slučaju smrti radnika članovima njegove uže porodice se isplaćuje jednokratna novčana pomoć za pokriće troškova sahrane u visini četiri prosječne neto plaće isplaćene u Federaciji BiH prema posljednjem objavljenom podatku Federalnog zavoda za statistiku za prethodnu godinu.

(2) U slučaju smrti užeg člana porodice radnik ima pravo na isti iznos naknade kako je definisano u stavu (1), ovog člana.

(3) U slučaju ozljede na radu, teške bolesti i invalidnosti radnika, ili člana njegove uže porodice, isplaćuje se jednokratna novčana pomoć u visini od 2 (dvije) prosječne neto plaće isplaćene u Federaciji Bosne i Hercegovine prema posljednjem objavljenom statističkom podatku u skladu sa zakonom.

(4) U slučaju teške bolesti i invalidnosti radnika koja nije rezultat povrede na radu i profesionalnog oboljenja, radnik ima pravo na jednokratnu novčanu pomoć u visini od dvije prosječne neto plaće isplaćene u Federaciji BiH prema posljednjem objavljenom podatku Federalnog zavoda za statistiku za prethodnu godinu.

Član 7.

(Dnevnice i drugi troškovi)

Pravo na dnevnicu, kao i visina dnevnica i drugih troškova službenog putovanja, te način njihovog obračuna i isplate uređuje se propisima Vlade Kantona i Vlade Federacije BiH.

Član 8.

(Donošenje rješenja)

Pravo na naknade predviđene odredbama ove odluke, ostvaruju se donošenjem rješenja koje donosi direktor ustanove obrazovanja.

Član 9.

(Usklađivanje internih akata)

Direktori osnovnih i srednjih škola obavezni su da u roku od 10 dana, od dana stupanja na snagu ove odluke, sa istom usklade sve svoje interne akte.

Član 10.

(Stupanje na pravnu snagu i početak primjene)

Ova odluka stupa na snagu danom donošenja i objaviti će se u „Službenim novinama Zeničko-dobojskog kantona“, a primjenjuje se od 01.03.2018. godine.

Broj: 02-34-8099/18.

Datum, 14.05.2018. godine

Z e n i c a

PREMIJER

Miralem Galijašević

DOSTAVLJENO:

1x Ministarstvo za obrazovanje, nauku, kulturu i sport,

1x Ministarstvo finansija,

1x „Službene novine Zeničko-dobojskog kantona“,

1x a/a.